

【经文信息】大正藏第 12 册 No. 0394

佛入涅槃密迹金刚力士哀恋经 1 卷

No. 394

佛入涅槃密迹金刚力士哀恋经

失译人名今附秦录

牟尼世尊在拘尸那城娑罗林间北首而卧，初入涅槃。

时密迹金刚力士见佛灭度，悲哀懊恼作如是言：「世尊成就最胜无上十力，云何于今乃为羸弊无常气势微劣之所摧败？如来舍我入于寂灭，我从今日无归、无依、无覆、无护，哀恼灾患一旦顿集，忧愁毒箭深入我心。」

密迹金刚作是语已，恋慕世尊愁火转炽，五内抽割、心膺磨碎，蹙踊闷绝譬如岩崩，颠堕于地久乃醒悟。即起而坐，涕哭哽噎歔歔而言：「怪哉怪哉，死魔大恶！无量功德波罗蜜聚，为彼死魔之所灭坏。」

复作是言：「唯愿真济请为我起，我今薄佑无依凭处。云何世尊舍弃于我独入寂灭？自今已后永离哀颜，世尊寂静身、口、意业更不可覩，更不得见佛婆伽婆入于佛住。」

「如来昔日入于佛住三昧之时，威德光显倍常殊妙，佛面鲜泽过于莲华新开敷时，如日初出照于朝阳，如是胜面更不可见。」

「如来处于大众出大雷音、微妙之声，更不可闻，诚言无二、离过患说、无谄伪说、易解了说、众所爱说，世界之中灭除诸恶至甘露城，无过佛法。咄哉！真济永入涅槃，使诸众生无有救护，处于生死大旷野中，又无眼目，离于导师，谁示其道？」

「如来密云能雨甘露，为无常风之所吹灭。一切众生爱火所烧，而于今者佛入涅槃，谁雨法雨灭其爱火？」

「如来于今灭于有为得无上道，为于众生作大医王。一切世界为烦恼病之所患苦，今入涅槃，谁当矜愍化以正道，疗诸众生结使之疾？」

「如来。世尊名为知思念于恩者，我从处胎以来随逐如来如影随形，调和奉顺不曾违阙。云何不感我之至心，便见孤弃如背恩者？」

「呜呼怪哉，咄哉大苦。此金刚杵当用护谁？即便掷弃。自今以往当奉侍谁？谁当慈愍训诲于我？更于何时得覩尊颜？护世之王为显甘露，故遣我来拥护于佛，如何今日卒舍我等入于涅槃？我所有命依佛而存，一旦舍我，当依于谁得存此命？」

「咄哉！真济矜愍一切，常说妙法教照愚冥。何故今者而卒不言？」

「如来所知一切种智过一切上，恒于众生有缘之者思欲利益。即于今日何处去耶？而于今日便自闭默，更不救济受化之徒。诸魔、恶人见佛涅槃，皆大欢喜。」

「如来。世尊生死海中作大船师，而于今日永舍济度。是诸众生无量劫来顺生死流，唯有如来能以正道令诸众生皆得返流。如来。世尊永断烦恼，为于愚冥众生作大照明。今日涅槃，世间众生增长黑闇，永为无明之所覆蔽。」

金刚密迹哀呼悲恼复作是言：「世尊诸相——三十二百福大人相——悉皆具足，如何灭坏永不可覩？」

「哀哉，破坏魔者！哀哉，转法轮者！哀哉，灭一切外道萤火虫者！哀哉，能坏有身者！哀哉，诸智慧城者！哀哉，法灯为无常风之所吹灭；哀哉，法月为死罗睺之所吞灭。」

复作是言：「大寂真济！愿为我说，即于今者为何处去？至何方所？为适何国？为至舍卫及王舍城、迦毘罗卫、波罗奈耶？于此诸国为何处住耶？」

「今为在何林？为在迦兰陀竹林、庵婆罗林、祇陀林？于此诸林为在何处？」

「为在何山？为在自善山、毘提酰山、耆闍崛山？于此诸山为在何山？愿语于我实在何处。」

「诸八部——众天、龙、夜叉、干闥婆、阿修罗、紧那罗、摩睺罗伽如是等——以见于我常随从佛，设当问我：『佛何处去？』我当何辞以对于彼？」

「世尊昔日教化众生，若小疲倦暂寢息时，系心在明为益众生。云何今者舍于一切，永入涅槃更不利益？」

「真济！愿为我起。我忧悲火炽然胸中，命将不全，愿赐一言，犹如冷水灭我炽火；我今为忧苦毒蛇之所蛆螫，愿赐我法阿伽陀药以除我毒；忧愁毒箭深入我心，愿赐语钳为我拔出。」

「一切众生爱别离苦，如来常为说种种法除其苦恼。云何独不愍我，为我灭此众苦？」

「如我今者，哀逆闇塞不能推理而自释割忧心内病、种种譊语。云何世尊不见慰喻我之恭顺心不疲惫、乐见慈颜无有厌足？投身于地愿一瞻覩，如何世尊不见哀矜？」

「灭结牛王常挟持我，何不将我入于涅槃？独见孤弃。」

「我失如来，诸苦所切无量无边又不见谛。何故独见放舍入于涅槃？」

「怪哉怪哉。如来一睡更不起耶？如来已去不复还耶？犹如灯灭更不复明、如宝楼崩更不建立、如宝藏没不可还出。」

举手大叫，发声悲哭，如帝释幢所持绳绝倒地不起，宛转啼哭，心、肝、咽喉、唇、舌悉皆干燥，荒迷蹙地。良久乃稣。

爱恋如来功德之身，捉相轮足，急抱不放而作是言：「如来之足如优钵罗华、如日初出清淨柔软。安立之足、千辐轮足，极妙工巧不能画作。转轮圣王虽有是相，相不明了；如来相轮辐毂具足，炳然显著。其指纤长，附顺相着不稀、不踈，其爪红润犹如赤铜、手足网縵犹如鹅王、肌体丰满无筋脉皮皱，天王、人王、诸鬼、神王及以龙王，咸以天冠顶礼佛足。为化一切诸有缘者，以相轮足遍行世界，而今此足更无有用。」

「我于昔日心常喜乐，一旦涅槃更不令我生于喜乐，而此无常极为大恶，能坏无量功德不思議色。」

「如来威势能令见者身心欢喜，无量福力持如来身。无常之力实为最大，能使如来至于死处。如来以父母乳哺之力、禅定力、智慧力、神通力，以此诸力不能于无常力中而自拔济。」

「阿难昔日劝请世尊住寿一劫，如来何故不受其请？」

「真济往昔不于三阿僧祇劫中作百千苦行、难舍之事一切能舍、无数劫中历侍诸佛、奉事供养求一切智，欲济众生。于少许时，所度未几便入涅槃。如来往日为菩萨时，化于众生犹不疲极，而于今者可疲倦耶？」

「浊法众生如新生犊满十二由旬，云何断乳而弃之去？请为我起与浊法犊饱足甜乳。」

「于时帝释数亿诸天来欲问难，云何而不为其解说？千世界主梵天王合掌请法，今日何不为说法要满其所愿？毘沙门王数千万夜叉而自围遶、提头赖咤干闥婆众而自围遶、毘留勒叉究盘荼众而自围遶、毘留博叉诸龙之众而自围遶，如是等众皆为饮法甘露而来至此，如来何不以良药救诸疾者？」

「外道诸众毁谤于法，何不速起坏彼邪论？欲界之主处处坏乱，何不降伏？如来！诸声闻少于智慧、不勤习诵、厌于广博，何不速起为说略要令知正道？」

「然今阿难是佛所亲、奉侍世尊，未断结使尽于根本，何不教授令尽诸结使？」

「呜呼怪哉。如此坚实大福德人一旦灭坏，而此无常如护财象残害无数。此护财象身大如山，如来往昔犹能调伏如是大象，云何今者反为无常之所调伏乃至灭尽？」

「如阿婆罗龙能坏摩竭提、兴大云雷电光炽然、降注大雹摧折树木。如来能伏彼大力龙，而于今者反为无常之所乘服。」

「如鸯掘魔暴虐残害，犹能调彼刚强恶人；调彼不调牟尼世尊，今为无常之所摧坏。」

「如旷野恶鬼残杀一切令国空虚，犹能调彼使受持戒；而于今者入无常羸摧灭无余。」

「如优楼频螺迦叶染着于我、没于邪见榛林之中难可拔出，如来犹愍，能现十八种神足变化能令调伏；今为无常之所倾倒。」

「一切众生薄于福佑，大智之海为无常日之所干竭；正智须弥为无常金刚杵之所摧碎；佛功德树——觉意妙华道果充满——为无常斧之所斫坏；广大智光——名称周闻遍于世间，能烧一切有生之薪——为无常水之所浇灭也。盛力无常无有法教，不为智者之所禁制，非是精进瞻勇、猛健势力、名称柔心、调根寂定之所能免。咄哉，无常！酷暴乃尔，不别好恶、有德、无德等能摧坏。」

作是语时，大地震动、山顶崩坏、大星陨落、四方火起、日月诸宿无有光色、一切天人皆无欢乐。

「我今形体不自胜举欲没入地，眊眩黄黑、心意错乱、忘失所念、唇干舌燥、语言错误、声音嘶碎，去死不远，命终今必绝，逮佛舍而去。」

如是等多众种种哀呼、百千种言恋慕于佛。

帝释语言：「止止已足。汝今可不忆念大仙少语？佛告比丘：『诸行无常，无得住者、不可体信、是变易法。一切聚集归散会灭，高者必堕、合会必离、有生必死。一切诸行犹如河岸临峻之树、亦如画水寻画寻灭、亦如泡沫、如条上露不得久停、如干闥婆城暂为眼对。人命迅速疾于射箭、速行天下疾于日月，人命速疾过于是天，无常败坏应当解知。若于佛事有不足者不入涅槃，佛事周讫乃入涅槃，以此佛法付嘱人天、以此重事与声闻弟子，向无畏寂灭处去，诸有苦尽更不受生。汝等不应生大忧恼。』」

佛入涅槃密迹金刚力士哀恋经

【经文信息】大正藏第 12 册 No. 0394 佛入涅槃密迹金刚力士哀恋经

【版本记录】CBETA 电子佛典 Rev. 1.19 (Big5)，完成日期：2010/08/24

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，毛佩君、廖予安、廖予慈大德提供新式标点，其他

【其他事项】本数据库可自由免费流通，详细内容请参阅【中华电子佛典协会数据库版权宣告】
